

## Mój drëch – brzëch

Tómk Fópka

*Gùst òkrãgli jak czerzenka*

*Szerszi jak nôwikszô rënka*

*Brzëch gò cygnie prosto w dót*

*A nômilszi w kuchni stót*

*Jesz përzinkã, jesz chòc kqsk*

*Jòdt jãz mù kałdun sã trzqst*

*Jesz chòc përzniã, jesz kqsynek*

*Temù Augùst grëbi bét!*

Reno, czej jem òdecknął na mòjim stolëmnyim łózkù, na chtërnym bë mógl wëładowac fliger– jesz gò nie bëło. Sygnãło le przewrócëc na bòk a pò tim wstac – i ju sã òbjawił w całi swi kròsy: wiòldzi a òkrãgli jak miesãdz w pełni.

- I co sã tak na mie zdrzisz? – brzëcha jes nie widzót? – zapitót dërno. – Dòj pòkù – jem so sóm siebie ùspòkòjiwót. Bò më so dwaji kòrbimë ze sobã. Òn colemało mrëczy, òdmrëkiwò. W całoscë, czej je głodny – mô wiele do gòdaniò. Jesmë ju tak do se przënáconé, co to jinaczi sã nie dô. Biwò, co gò ò radã proszã. Razã mùzyczi słëchómë, filmë w internetach òbzérómë. Wiedno mô co do rzeknieniò.

Czej jem sã z nim wëkrãglót z wërów a szedł do kãpnice, dze pòłowã czasu zeszło na jegò mëdlenié a spłókiwanié. – To bë, dolëbóg chùtczi szło w jaczi autółowi mëjni. Leno, co bë piãc złotëch wpùscëc w maszinã, òkrãglëczka do kabinë wësadzëc, sprisznicowac a przë leżnoscë bótë wëpùcowac (chòcò nie je wiedzec, co to za jaczi są, bò bez brzëch nie jidze jich dozdrzec). To bë jesz pewno zbiegło na lakerowanié, sëszenié a mëcé pòdwòzò...

Òbuc gò téz nie je letkò. Kòszla mùszi bëc wikszò òd pòdkòszulczy a wãps – jesz wiksz. Pòmału nëch iksów zaczinò felowac... Bëlë jaczégò pasa do bùksów ni ma co próbòwac, bò òn nié leno bùksëska trzimie – le całi brzëchòwi majestat. Temù pas z jaczi mòcny bùli abò krokòdilowi skórë mdze wierã nôlepszi. Wiedno mòze sobie téz dròbantë zainsztalowac – tedë brzëcha ni ma tak widzec, le mùszi òpasowac, co sobie jich za krótkò nie scygnie, bò tej chłop za białką szlachùje.

Czejbë sã chcót czesto wënagòlëc a z nim na jaką plażã jic – za długò bë tam nie nie leżót, bò te grinpisë gò za jaczégò wieloriba wżälë a wcyg nazót do mòrza wrzucalë... A do tego białczy dzys-dnia nie lëdają za baro tëch z brzëchama. Wszëtkò mô bëc fit – zmiarté. Leno miészczì mògã bëc pãkaté. Z dëtkama. Bòdòj kòl jaczychs afrikańszëch ludków jesz rozmiejã achtniwac chłopów z brzëchama, bò jak sóm siebie ùzëwił – to ò familiã zadbò.

- Jò bë co zjòdt – òn mrëczy dali. – A cëz tã bë tak chcót, zupkã, jaje na mitkò? A òn mie taczé menu wëwidniwò: sztëk chleba szmòltã pòsmarowóny ze sledzã, do tegò liter smiotanë do pòpicò a pót fuńta wãdzonégò miãsa – na przëgrizkã. Co chcót – to dostót. Brzëch je ze zãbòma w dogòdënkù. Ti na

dole bëlno wiedzą, czej ti na górze to przegrzęą. Czedë to szło ju w dół do dzegwieniô – mój drëch stół sã dëbëlł wiöldzi a dwie knąpë pòpùscëtë ze sromòtë.

Czedë më sã zadostelë do autóła a rëgnãlë pòd robòtã do Wejrowa, w radio zacząlë òstrzegã: òpasujta, bò dzysô je na drogach slëskò a letkò jidze sã spùrgnąc. Ten mój mie na to: za tima cëgónama sã nie czeruj, nie chcesz sã spòznic – przëcësnij përzniã nen gaz! Tak tej jem przëcësnął a na pierszim zòkrãce më wjachelë w rów, to le zgrochòta. Tak-cos jô z nim móm co sztót. Jednegò dnia, prawie w pòstny piątk òn mie namówił, cobë òd Bendików w Nowim Dwòrze pòde drogã worztã a kwasné mlékò kùpiac. Jesmë sprawilë a tej jachelë. Worzcëskò bëłò zmiarzłé na gnòt, temù jem je so midzë ùda wsadzył na rozgrzenié a kwasny mlékò pòpijòł. Naròz zez krzaków wëskòklë szandarzë. Jem przëscygnął. Mlékò mie zalało całą gãbã razã z òkùlòrama a szandara widzacë taczi òbròzk z na wpół òdtajónã worztã midzë nogama – wsmarowòł mie sztròfã za nieòbëczajné zachòwanié na drodze.

Nieròz sã òdzëwò, czej nie je mù nót. Biwò, co w kòscele, òbczas cëchégò mòdlëniô – òn glosno co swòjégò wmòdli. Jaczë „amen” w pòłowie nowennë abò lëtanie. Na kòzanim wiedno drzëmie, colemało, czedë je jimrotné. Ùwòzno slëchò za to òbczas dëszpasterszczëch ògłoszeniów. Jinteresëje gò, chto kògò mò żeniałé a chto ju szedł w klónë. Nazòt dodóm mò ò tim wiele do gòdaniô...

Mój drëch je baro wërobiony pòliticzno. Czej jem czejs sã ùceszil: ale ta nasza ti Ùrzuli w Brukseli napëskòwała! To ji jaz w ne niemiecczë piãtë szło! Òn mie na to spòkójno: i co sã szerszenisz a smiejesz jak Rusk do kòłòcza? Napëskòwała a terò bãdzemë ZYCHER, co òni GWËS nawetkã DËCHT złómionégò dëtuszka Pòlsce nie dadzą. Abò jinã razã mëszlã sobie: za czim ti amerikónie taczégò òpiégò na prezydeńta pchają, kò to je ale żëwi trup prosto. A mój brzëch na to: przëzdrzë le sã na se... Temù ma dwaji na welowania chòdzymë apart.

Chòdzymë... Òn nawetkã chòdzy pò swòjémù. Równò, czë drëbòlã, czë jidã kraczajoma – to brzëmi pòdobno: jô: krok, krok – a òn: zybù, zybù, zybù – jak bë jaczégò francëszczégò piłkòrza chto wòłòł... Jak tak sobie we dwùch bez kròj a rój wanożimë, zdòwò mie sã co nie jem sóm, nawetkã jem niésóm...

Wczora, czej jem so pòstanowil wzac za dietã – miòł jem od nie do slëchaniô... A że to nikòmù nie je do zëcò pòtrzebne, a że dietã kòmùnyscë mają wëmëszloné, cobë mni òbiwatela w państwie bëłò. A że to je na pewno mòja wina, bò miészóm cëczër w arbace nié w tã stronã... A jenë jo...

Lëdze gòdają, co jô jem człowiek – òrkestra. Cos w tim je, równak ze wszëtczich mòjëch jinstrumentów – nôbarzi mie sã bãbel ùdòł...

*Jem jô na diece – dochtór jã zapisòł*

*W swim gabinece, zarò z rena, dzysò*

*Ni móm jesc miãsa, na bòk słodczë smaczci*

*Do tegò pëlów farwnëch sztërë paczci*

*Të mòje sturice ùpieczë plinice*

*Nalëj bónkawë, pòstaw na stół*

*I leno sã sprawie drawò,*

*Bò marsza grajq mie flaczi znòu!*